



Broj: 01/3-50-3-3-12/16
Sarajevo, 8.12.2016.

Z A B I L J E Š K A

s radnog sastanka Komisije za vanjsku trgovinu i carine Predstavničkog doma PSBiH u Regionalnom centru Sarajevo Uprave za indirektno oporezivanje BiH, održanog 8. decembra 2016. godine

Na 12. sjednici Komisije za vanjsku trgovinu i carine (u daljnjem tekstu: Komisija), održanoj 2.11.2016., zaključeno je da će članovi Komisije u narednom periodu organizirati posjete regionalnim centrima Uprave za indirektno oporezivanje BiH redoslijedom: Tuzla, Mostar, Sarajevo, Banja Luka, o čemu će blagovremeno obavijestiti UIOBiH, a povodom Informacije UIOBiH i dopisa špeditera i firmi uvoznika polovnih motornih vozila s područja Regionalnog centra Tuzla.

Sastanak je održan u prostorijama Regionalnog centra Sarajevo, s početkom u 11 sati.

Sastanku su prisustvovali: predsjedavajući Komisije Šemsudin Mehmedović, drugi zamjenik predsjedavajućeg Komisije Nikola Lovrinović, te član Komisije Mensura Beganović, stručni savjetnik u Komisiji Radomir Marjanović i šef Odjela za informiranje Sektora za odnose s javnošću u Sekretarijatu PSBiH Zoran Žuža.

Opravdano su odsustvovali članovi Komisije: Nenad Lalić, Safer Demirović, Nikola Špirić, Zaim Backović, Mirsad Mešić i Miroslav Milovanović, te sekretarka Mirjana Crnjak.

Iz Uprave za indirektno oporezivanje BiH Banja Luka nisu se odazvali pozivu iako su uredno pozvani.

Iz Regionalnog centra Sarajevo sastanku su prisustvovali: šefica Grupe za carinske postupke Nerminka Gračić, šefica Grupe za tarifu, vrijednost i porijeklo robe Esma Hodžić, šefica Grupe za kontrolu Ana Mrnjavac, šef CI Sarajevo Edin Cernica, šef CI Zenica Hamdo Sušić i stručni savjetnik u Grupi za kontrolu Emir Hasanović.

Svrha radnog sastanka je detaljnije upoznavanje članova Komisije o načinu, uslovima rada i problemima s kojima se Regionalni centar Sarajevo susreće, te o aktivnostima, nadležnostima i planovima.

U ime Komisije Šemsudin Mehmedović pozdravio je prisutne i istakao da je ključni razlog zakazivanja sastanka raspravljanje o dopisu špeditera i firmi uvoznika polovnih motornih vozila s područja Regionalnog centra Tuzla u kojem navode neravnopravan odnos i status u vezi s nekim instrukcijama koje su date pojedinačno, a suprotne su Zakonu o carinskoj politici.

Cilj sastanka je upoznati se sa uslovima rada i problemima s kojima se Regionalni centar Sarajevo susreće, funkcioniranjem carinskih ispostava te strukturom zaposlenih, nacionalnom i kvalifikacionom.

Naročito interesovanje iskazao je prema problemima carinjenja automobila, tekstila, kafe i alkohola, odnosno visokoakcizne robe.

Dobrodošlicu članovima Komisije poželjela je šefica Grupe za carinske postupke Nerminka Gračić i istakla kao otežavajuću okolnost u radu neriješeno pitanje i upražnjeno radno mjesto šefa Odsjeka za carinske poslove.

Prezentirala je osnovne pokazatelje poslovanja Centra, prihod i strukturu prihoda po vrstama robe i vrstama dažbina. Također, prezentirala je i količinske pokazatelje po vrstama robe, upoređujući ih s prethodnim periodom.

U raspravi su učestvovali: Mensura Beganović, Nikola Lovrinović, Hamdo Sušić, Edin Cernica, Ana Mrnjavac, Emir Hasanović i Esma Hodžić.

Članovi Komisije u raspravi su upoznati s trendom smanjivanja broja carinjenja novih i polovnih putničkih motornih vozila na području koje pokriva ovaj regionalni centar, kao i razlozima takvog trenda. Naglašeno je da zaposleni u ovom regionalnom centru striktno primjenjuju zakonske propise, vrše detaljne kontrole u svim carinskim ispostavama na području Centra, te zahtijevaju jednoobraznost u postupku carinjenja putničkih motornih vozila.

Istaknuti su problemi carinjenja tekstila kao i akcizne robe, od kojih je zabilježeno povećanje carinskih prihoda.

Kao poseban problem naglašena je potreba za ujednačavanjem sudske prakse u pogledu okončanja carinskih sporova, kao i potrebe donošenja preciznih podzakonskih akata za pojedine oblasti.

Članove Komisije interesirala je i kadrovska problematika, odnosno popunjenost važeće sistematizacije, struktura zaposlenih, stručna i nacionalna, te način raspoređivanja zaposlenih s jedne lokacije na drugu, unapređenja, kažnjavanja i slično.

Nakon rasprave, Šemsudin Mehmedović obavijestio je prisutne da je Komisija održala sastanke u regionalnim centrima Tuzla i Mostar, a da je sastanak u Regionalnom centru Banja Luka kao i Glavnom uredu UIO Banja Luka zakazan za narednu sedmicu.

Na osnovu saznanja s ovih sastanaka, Komisija će sačiniti i usvojiti zaključke i postupiti u skladu s nadležnostima Komisije.

Ovaj prijedlog prisutni članovi Komisije jednoglasno su prihvatili.

Sastanak je završen u 12,30 sati.

Stručni savjetnik u Komisiji
Radomir Marjanović

Predsjedavajući Komisije
Šemsudin Mehmedović